

嘉興府志卷三十三

人物志

列傳儒林

嘉興縣

唐

徐岱字處仁嘉興人好學六籍諸子悉所探究問無不通
難莫能詘轉運使劉晏表薦爲校書郎浙西觀察使李
栖筠欽其賢署所居爲復禮鄉擢河南偃師尉禮儀使
蔣鎮薦爲太常博士改膳部員外郎遷水部郎中充皇
太子侍讀尋改司封郎中擢給事中兼史館修撰並仍

侍讀兩宮恩遇無比而謹慎過甚未嘗洩禁中語亦不
談人之短甥姪遺孤者婚嫁之卒贈禮部尙書

宋

陳舜俞字令舉博學彊記應材識茂異賢良方正直言極
諫制科擢第一是時舜俞已登進士乙科復中是選文
章聲名赫然在人上始授光祿丞簽書壽州判官以屯
田員外郎宰山陰秩未滿召試館職不就青苗法行不
奉令上疏自劾責監南康軍鹽酒稅在貶所與太傅劉
凝之跨雙犢窮泉石之勝後歸嘗乘白牛往來溪上自
號白牛居士鄉人名其居曰清風涇及卒蘇軾稱其學

術才能兼百人之器慨然將以身任天下之事而一斥不復士大夫識與不識皆深悲之著有都官集三十卷廬山記五卷行世

衛湜字正叔涇弟好古博學集禮記諸家傳注爲集說凡一百六十卷上之朝官至寶謨閣知袁州學者稱櫟齋先生

張葆光市居讀易一目睛突出乃用蕉葉熨眼且熨且讀遂超然有得往見黃冕仲冕仲曰如師卦六爻長子帥師弟子輿師在師中吉易之理極分曉易讀葆光曰作如此說宜其易也請布算於前敷衍其義冕仲許之乃

削簡盈箱布算縱橫所謂八陣圖五花陣諸法無一不出六爻之數冕仲駭服葆光隱居樂道不求聞達世但以葆光稱之

元

潘澤民名著以字行本大梁人宋南渡占籍嘉興幼失父鞠於伯兄俾習吏事澤民曰家世業儒吏非吾習也中鄉試備榜補吳郡甫里書院直學游京師以薦爲中書省從事後辟吳興郡幕辭乃留主郡學其講道設教悉取法胡安定再辟浙東元帥府史使海寧行御史臺留爲椽卒有晏集詩心性論行世

聞人樞字德機郡之望族也嘗從鮑仲孚受業又登江西
夏日孜之門遂通易學至正癸卯中進士授承事郎易
州同知未及上官以疾終

明

支立字中夫事母以孝聞以鄉舉爲常州府教授充順天
同考官時大璫注直於途次投千金欲薦其姪立以狀
白當事入闈檢其卷抹去名大震遷翰林院孔目與羅
倫姚綬相友善敦務本爲己之學博通諸經妙于講解
時號支五經子高亦知名

王儒字汝珍篤學力行鄉邦稱宿儒正德丙子舉於鄉初

令星子再令崇陽以艱歸服闋改順天府學教授北地
鮮學加意造就弟子嚴鉷初居塞外徙置學旁教之後
成進士任本府太守儒益自重未嘗以尺一干之轉興
山令致仕歸

周從龍字彥雲父惟義爲教官從龍以鄉舉選肇慶推官
擢南京大理評事不赴歸性孝友閉戶著書精研理學
有大學遵古編中庸發覆編論語蠹談孟子支言六委
繹聖等稿學者稱麟潛先生

國朝

李明齋字山顏梅里人少著名復社流寓閩嶠順治三年

閩籍中式授古田教諭以興復禮教爲己任時遼陽佟國鼎巡撫八閩延掌書記有流民數千入福州境佟疑其寇也將悉寘諸法明愨白其寃得釋歸里以著述終身嘗入蘇門山與容城孫逢奇辨析理學宗傳頗相推重著有樂志堂詩集

李集字繹初以進士知鄖縣少潛心先儒之書學使者雷鎡謂之曰當爲正學中不朽人物在鄖多惠政築陂池焚妖木邑人頌之有風烈何殊陸清獻神明已逼鄭山公之句晚精經學著有周易願學編尙書信古錄毛詩無邪訓孝經玉律六忍居詩文集子旦華字憲吉優貢

嘉身所記 卷三十三 四
生弱齡應童子試亦見重於學使其經解卷冠一郡
曰秀才中無是人也後學使竇公光鼐稱其學問第一
貢成均年僅二十九卒著有周易象義十六國世系表
青蓮館稟

秀水縣

明

沈謚字靖夫父復有厚德謚爲諸生卽慨然慕道一日讀
陽明傳習錄有悟卽擬渡江從之游會陽明征思田不
果聞湛甘泉薛中離講學京師遂就正之相與闡性命
旨嘉靖己丑成進士授行人遷刑科給事中條上四事

一重輔臣之選二表理學之臣三重風紀之任四均東南之賦表理學者請以吳與弼胡居仁陳獻章王守仁下禮部議謚從祀也劾罷自官男子二千餘人又專疏糾輔臣張孚敬怙勢不法出爲山東僉事乞養歸母憂服闋起江西僉事備兵大庾平李文彪之亂假歸進湖廣參議未赴而卒謚內行醇篤畫地而蹈不失尺寸嘗建書院於文湖祀陽明湖在秀水縣北四十里與錢德洪王畿唐樞諸人往復切磋學者翕然嚮風稱石山先生入鄉賢祠有石雲家藏集

錢同文字大行嘉靖癸丑進士弱不勝衣而志氣矯然特

立初聘婁人女鄉薦後其家願易婚同文怫然不允知
祁門縣每聽訟了無聲色藹然數語剖決無不當者褒
節行禁博徒事事詳覈倭寇傍邑偵知守禦嚴不敢犯
累遷知萊州府生平敦儒行講學王文成門洞悉原本
王愛字體仁樸子嘗從唐一庵遊相與印證務求實踐動
有規矩尺寸不敢踰越年踰五十登嘉靖己未進士就
教順天與諸生日夕講究嘗曰學以自檢檢人則隘學
以容人自容則怠遷國子丞擢刑部主事有藉時相庇
譁飲禁中逮治不少貸尋歸絕意仕進性無城府遇之
如坐春風中角巾散步疎髯廣額望之如神仙病劇神

色不亂咏黃鶴詩而逝

陳懿典字孟常萬厯丙子以儒士應試擬元司臬以未入
黷序疑之直指艱然曰此卷豈當後人寧遲下科應不
失第一也旋補博士弟子已而已卯果領解壬辰成進
士官編修時神宗皇儲未建諭封三王抗疏祖訓無元
子並封之例又論宰臣依違遷就無匡救輔弼之策朝
論臆之尋轉中允諭德冊封魯藩餽遺悉却以目眚假
歸葉向高薦懿典負經世之才宜大用詔起掌院學士
不就採輯蕭顯兩朝有關修齊之要者成聖政聖學四
卷上之書中指切宦官不得干政以寓規諫魏忠賢銜

之忠賢敗得免崇禎初晉少詹益遂初志里居三十餘
年品誼清介書無所不觀著吏隱集論孟貫義就李往
哲傳左陞紀略諸書嗣子泰寧諸生著尙書講義

國朝

徐嘉炎字勝力贈太僕世淳孫一目十行下誦三遍終身
不忘與松江夏存固嘉善錢不識警敏相頡頏頗有三神
童之目與從父善同庚同席研人稱大小阮康熙壬子
副榜戊午舉博學鴻詞授檢討充明史纂修官典貴州
試歷侍讀學士與學士張廷瓚曹鑑倫史夔同直 南

書房

召嘉炎至榻前問爾五經通鑑皆能成誦否嘉炎奏五經或可背誦通鑑恐未能悉舉其詞隨問尙書咸有一德嘉炎奏明書旨朗誦終篇後更端問宋元祐三黨諸人是非嘉炎數對諸人姓名始末及先儒論斷優劣語

特賜御書臨蘇軾詩一卷是時詞臣未有

賜御書者拜

賜自嘉炎始尋陞內閣學士兼禮部侍郎充

三朝國史及會典一統志副總裁以疾告歸

賜御書直西清額及對聯詩幅嘉炎居家事母孝待昆弟羣從

以誠貧不自給典朝衣冬夏相易歲以爲常

諸錦字襄七號草廬家寒微父有隱德錦生數歲孤母氏
爲擇師日攜以就塾力鍼黹以供脯修錦亦自發憤刻
勵甫冠以舉人考授內閣中書成進士由庶常改知縣
再改金華府教授乾隆丙辰以博學鴻詞授翰林編修
典福建山西貴州試歷左贊善假歸不復出錦於書無
所不窺於箋疏考核尤精詩格學韓蘇書法瘦硬如其
人著有毛詩說饗禮補亡夏小正詁及絳耐閣詩文集
嘉慶二十四年正月奉

部題准入鄉賢祠

鄭虎文字炳也乾隆壬戌進士授編修典河南鄉試督湖

南廣東學政歷左贊善歸主徽杭書院十數年卒虎文
於學靡不通衡文兼攬衆長無遺美少孤竭力養母母
病禱於神請減算畀母竟如所禱事兄如父撫諸姪諸
甥如子分衣共爨五十年如一日素以經濟自負嘗願
爲知縣謂縣令切近民易知民間疾苦一令賢則一縣
治天下之令賢則天下治人以爲名言著有吞松閣詩
文集季子師雍讀書過目了了而其意邈然視文字若
糟粕者十五舉於鄉十七天

錢載字坤一父炆性闕曠貧至不舉炊不知也載自少不
耐爲舉業文爲之輒崛奇不合時樣故不售載不顧益

肆力於古漁獵百家尤以詩爲命獨窺古人奧繼鑿不
已旣以副榜薦博學鴻詞薦經學皆不獲王中始聯捷
年四十五矣由翰詹累擢禮部左侍郎充會試同考官
者三典江南江西廣西鄉試凡五又視山東學

命往秦蜀祭告

上書房行走癸卯致仕癸丑卒於家載詩凌紙怪發險入復
入橫出復出於古不名一家更歷萬里游壯觀嶽瀆吸
靈奇之氣而張之故老益肆益硬載名自未第時已達
天聽受知遇立朝三十年秉正不阿終其身食貧不知貧有父
風性直常折人過而周人急如不及畫其餘事世珍之

著有堯石齋詩文集

盛世佐字庸三以進士發貴州署湄潭縣訟牒過目不忘授龍里縣未任丁憂補發雲南攝麗江井務以運銅勞瘁卒於途年三十八生平邃於經尤熟精三禮撰有儀禮集編積二千翻依經分十七卷不欲於一篇中橫隔也謂士冠禮自不醴則醮用酒以下卽記士相見禮自士見於大夫以下卽記凡註或連傳經爲傳隔之類悉爲更定至於鄭賈及楊氏之圖有失者胥正之刻綱領二卷附勘正監本石本補顧炎武張爾岐之闕宋元來說禮家未有若此之精粹者